

墨

子

二

蘇子知

如學

PDG

墨子卷之五

非攻上第十七

今有一人入人園圃竊其桃李衆聞則非之
上爲政者得則罰之此何也以虧人自利也
至攘人犬豕雞豚者其不義又甚入人園圃
竊桃李是何故也以虧人愈多其不仁茲甚
罪益厚至入人欄廐取人馬牛者其不仁義
又甚攘人犬豕雞豚此何故也以其虧人愈

多苟虧人愈多其不仁茲甚罪益厚至殺不辜人也地其衣裘取戈劔者其不義又甚入人欄廐取人馬牛此何故也以其虧人愈多苟虧人愈多其不仁茲甚矣罪益厚當此天下之君皆知而非之謂之不義今至大爲攻國則弗知非從而譽之謂之義此何謂知義與不義之別乎殺一人謂之不義必有一死罪矣若以此說徃殺十人十重不義必有十

死罪矣殺百人百重不義必有百死罪矣當
此天下之君子皆知而非之謂之不義今至
大爲不義攻國則弗之而非從而譽之謂之
義情不知其不義也故書其言以遺後世若
知其不義也夫奚說書其不義以遺後世哉
今有人於此少見黑曰黑多見黑曰白則以
此人不知白黑之辯矣少嘗苦曰苦多嘗苦
曰甘則必以此人爲不知甘苦之辯矣今小

爲非則知而非之大爲非攻國則不知而非
從而譽謂之之義此可謂知義與不義之辯
乎是以知天下之君子也辯義與不義之亂
也

非攻中第十八

子墨子言曰古者王公大人爲政於國家者
情欲譽之審賞罰之當刑政之不過失是故
子墨子曰古者有語謀而不得則以往知來

以見知隱謀若此可得而知矣今師徒唯毋
興起冬行恐寒夏行恐暑此不可以冬夏爲
者也春則廢民耕稼樹藝秋則廢民穫歛今
唯毋廢一時則百姓饑寒凍餒而死者不可
勝數今嘗計軍上竹箭羽旄幄幕甲盾撥劫
住而靡弊腑冷不及者不可勝數又與矛戟
戈劔乘車其列住碎折靡弊而不及者不可
勝數與其牛馬肥而往瘠而反往死亡而不

反者不可勝數與其涂道之脩遠糧食輟絕而不繼百姓死者不可勝數也與其居處之不安食飯之不時饑飽之不節百姓之道疾病而死者不可勝數喪師多不可勝數喪師盡不可勝計則是鬼神之喪其主后亦不可勝數國家發政奪民之用廢民之利若此甚衆然而何爲爲之曰我貪伐勝之名及得之利故爲之子墨子言曰計其所自勝無所可

用也計其所得反不如所喪者之多今攻三里之城七里之郭攻此不用銳且無殺而徒得此然也殺人多必數於萬寡必數於千然後三里之城七里之郭且可得也今萬乘之國虛數於千不勝而人廣衍數於萬不勝而辟然則土地者所有餘也王民者所不足也今盡王民之死嚴下上之患以爭虛城則是棄所不足而重所有餘也爲政若此非國之

務者也飾攻戰者也言南則荆吳之王北則齊晉之君始封於天下之時其土地之方未至有數百里也人徒之衆未至有數十萬人也以攻戰之故土地之博至有數千里也人徒之衆至有數百萬人故當攻戰而不可爲也子墨子言曰雖四五國則得利焉猶謂之非行道也譬若醫之藥人之有病者然今有醫於此和合其祝藥之于天下之有病者而

藥之萬人食此若醫四五人得利焉猶謂之
非行藥也故孝子不以食其親忠臣不以食
其君古者封國於天下尚者以耳之所聞近
者以目之所見以攻戰亡者不可勝數何以
知其然也東方有莒之國者其爲國甚小間
於大國之間不敬事於大夫國亦弗之從而
愛利是以東者越人夾削其壤地西者齊人
兼而有之計莒之所以亡於齊越之間者以

是攻戰也雖南者陳蔡其所以亡於吳越之間者亦以攻戰雖北者且一不著何其所以亡於燕代胡貊之間者亦以攻戰也是故子墨子言曰古者王公大人情欲得而惡失故安而惡危故當攻戰而不可不非飾攻戰者之言曰彼不能收用彼衆是故亡我能收用我衆以此攻戰於天下誰敢不賓服哉子墨子言曰子雖能收用子之衆子豈若古者吳

闔閭哉古者吳闔閭教七年奉甲執兵奔三
百里而舍焉次注林出於冥隘之徑戰於柏
舉中楚國而朝宋與及魯至夫差之身比而
攻齊舍於汶上戰於艾陵大敗齊人而葆之
大山東而攻越濟三江五湖而葆之會稽九
夷之國莫不賓服於是退不能賞孤施舍群
萌自恃其力伐其功譽其智怠於教遂築姑
蘇之臺七年不成及若此則吳有離罷之心

越王句踐視吳上下不相得收其衆以復其
讐入北郭徙大內圍王宮而吳國以亡昔者
晉有六將軍而智伯莫爲強焉計其土地之
博人徒之衆欲以抗諸侯以爲英名攻戰之
速故差論其分牙之士皆列舟車之衆以攻
中行氏而有之以其謀爲既已足矣又攻茲
范氏而大敗之并三家以爲一家而不止又
圍趙襄子於晉陽及若此則韓魏亦相從而

謀曰古者有語脣亡則齒寒趙氏朝亡我夕
從之趙氏夕亡吾朝從之詩曰魚水不務陸
將何及乎是以三主之君一心戮力辟門除
道奉甲興士韓魏自外趙氏自內擊智伯大
敗之是故子墨子言曰古者有語曰君子不
鏡於水而鏡於人鏡於水見面之容鏡於人
則知吉與凶今以攻戰爲利則蓋嘗鑒之於
智伯之事乎此其爲不吉而凶既可得而知

矣

非攻下第十九

子墨子言曰今天下之所譽善者其說將何爲其上中天之利而中中鬼之利而下中人之利故譽之譽意亡非爲其上中天之利而中中鬼之利而下中人之利故譽之與雖使下之愚人必曰將爲其上中天之利而中中鬼之利而下中人之利故譽之今天下之所

同養者聖王之法也今天下之諸侯將猶多
皆免攻伐并兼則是有譽義之名而不察其
實也此譬猶盲者之與人同命白黑之名而
不能分其物也則豈謂有別哉是故古之知
者之爲天下度也必順慮其義而後爲之行
是以動則不疑速通成得其所欲而順天鬼
百姓之利則知者之道也是故古之仁人有
天下者必反大國之說一天下之和總四海

之內焉率天下之百姓以農臣事上帝山川鬼神利人多功故又大是以天賞之愚富之人譽之使貴爲天子富有天下名參乎天地至今不廢此則知者之道也先王之所以有天下者也今王公大人天下之諸侯則不然將必皆差論其分牙之士皆列其舟車之卒伍於此爲堅甲利兵以往攻伐無罪之國入其國家邊境芟刈其禾稼斬其樹木墮其城